

Gij Laizyouz Giuzyieng

香火球的来历

□ Cungh Swmingz / 钟自鸣

Bi 1630, goengcoj ciuhgeq Mbanjgorenhanh Banh Yenzhwnj caeuq meh de daeuj daengz benq dieg Mbanjgorenhanh neix caux mbanj. Youq henz ndoeng hai naz ndaem haeux, hoeng baezbaez cungj deng nou caeuq roeg baenz gyoengq baenz doih daeuj caeg gwn gig youqgaenj. Bihaenx ngamq gvaq cieng, song mehlwg dawz geij gaen ceh haeux ceig doeksat bae doek roengz diegyaj bae, haetlaeng baez bae yawj, daengx nazgyaj cungj deng nou deng roeg sai gvaqdoh lo! Daxmeh simcieg dangqmaz, byaij coh

henz dah yaek diuq roengz raemx dai suenq lo. Mwhhaenx, gyaеuj dah baihgwnz miz gep ronggya ndeu lumj aen ruz nei, fouzbembem roengzdaeuj, gwnz de miz sam aen doengzcienz, sam diuz bwn gaeq caeuq sam diuz yieng. Daxmeh nyinhnaeuz neix dwg mehmbwn daegdaengq soengq fuk daeuj hawj de, couh dawz gij doxgaiq haenx bae ma ranz lo. Gangj daeuj hix caen geizheih, song mehlwg aeu doengzcienz bae cawx ceh haeux dauqma caiq doek, cap bwn gaeq hwnj gwnz rangz hoij youq gyaеuj

naz bibuengq, lumj duzromh youq gizhaenx hen, mbouj hawj gyoengq roeg nou daeuj nyoegnyamx naz haeux! Gij roeg gij nou caen mbouj gamj daeuj sai naz haeux dahraix. Songde youh ciuq yienghneix guh, youq gij nazreih wng hix venj haujlai “duzromh”, doengxhaemh lij youq gwnz “duzromh” cap sam diuz yieng……Daj mbat haenx le, bibi naz haeux ndaej demsou, vunzding hwngvuengh, miz gwn miz daenj.

Gvaqlaeng gyoengqvunz aeu doengzcienz cap bwn gaeq cap yieng

bae baiq dojdeih, aenvih haemq ndei daeuj guhcaemz, couh dawz daeuj guh giuz doxdwk guh’angq, giuzyieng couh yienghneix ndaej guh baenz lo. Doeklaeng vunz mbanj Banh Munglungz、Banh Cunzyinz song bohlgw ndaej cungqgawj, hwngdoengh gwnz-biengz, gwnz ciuzdingz guh sei hawj naeuz: “Song roeg caez mbin hoj raen daengz, bohlgw caemh buengj caengz miz gvaq”, caemhcaiq hawj gaiq benj ndeu, baihgwnz deugaek geij cih saw gim hung: “Hengzsienh Dingh Ak”, lij dawz ngaenz daeuj youq ndaw mbanj hwnj guh fouxguenj, naj fouxguenj baek song diuz geiz lungz saek lamz, angqhoh ranz vunz neix ok song boux gawjiyinz.

Gyoengqvunz Mbanjgorenhanh vih gamjaen caemhcaiq geiqniemh vunz-ciuqgonq, couh daengx mbanj gawjhengz doxdax dwk giuzyieng hozdung hoenghwdhwd, daj mwh-haenx hwnj, dwk giuzyieng hozdung couh ciemhciehmh cienz daengz gak dieg bae lo.

Boux Lwgnyez Maij Daej Ndeu

一个爱哭的小孩

□ Yang Gosuh / 向课书

Doenghbaez gonq, miz boux lwgnyez ndeu gig maij daej. Daxmeh nyaenx mbouj ndaej couh caenh de ok rog bae, mbouj hawj de haeuj ranz.

De lij youq bak douranz daejnganga seiz, couh deng song duz nyounqnyen dingqnyi lo. Song duz nyounqnyen neix couh lox boux lwgnyez neix naeuz miz dieg ndeu miz aen deihgoengq he, gvaq gizhaenx bae de couh ndaej dauq daengz ndaw ranz de lo. Boux lwgnyez neix saenq lo, couh riengz song duz nyounqnyen neix bae lo. Ngamq lizhai ranz de mbouj miz geijlai gyae, couh deng song duz nyounqnyen haenx gaemh de daengz gwnz bya bae. Seizneix song duz nyounqnyen cij conh heuj okdaeuj, youh raez youh hung, de laepda mbouj gamj yawj, hix mbouj gamj daej. De niemh naeuz: Baezneix dai lo, wnggai dingq daxmeh de gangj, mbouj daej yienghneix lai.

Seizneix, duz nyounqnyen he doiq doengzdoh de naeuz: “Dou dwg gwn noh ndip roxnaeuz cawj cig caiq gwn?” Doengzdoh de dap: “Cungj dwg gwn noh ndip, gou doq gwn nywnx caez, baezneix yaek gwn noh cug.” Yienghneix couh dawz boux lwgnyez neix daengz gwnz feiz bae gangq.


Gvaq yaep ndeu, boux lwgnyez neix sawqmwh ok roet. Duz nyounqnyen he nyinhnaeuz dwg sing noh de gangq ndaej baenz, couh naeuz: “Noh cug lo, mwngz bae ra dawh, gou youq gizneix hen.”

Doengzdoh de naeuz: “Gou mbouj guh! Gou baez lizhai, mwngz couh gwn noh liux bae. Dou aeu itheij bae ra dawh.” Yienghneix, song duz nyounqnyen neix couh guhdoih bae ra dawh lo.

Boux lwgnyez neix dingq mbouj nyi sing song duz nyounqnyen haenx gangjvah caeuq byaij roen liux, couh laeglemx dwk cengq da, mbouj yawjraen song duz nyounqnyen, de couh doq ndwn hwnjdaeuj, buetfwtfwt dwk dauqbae ranz de. De baez daengz bak douranz de couh swenj: “Daxmeh a daxmeh, doeklaeng gou caiq hix mbouj daej lo, hai dou hawj gou vaiq di, baihrog miz nyounqnyen rox gwn vunz!” Daxmeh de couh hai dou hawj de haeuj ranz lo. Gvaqlaeng boux lwgnyez neix caiq hix mbouj daej lo.



Dahsau Duncuz Sanhgyangh Guengjsae diuq fouxeaz.



Miz boux coz he maj ndaej yakyawj, cawz liux mbouj miz geijlai sang, lij laenggungq dem.

Miz ngoenz ndeu, de bae ranz boux yenzvai he cunz. Boux yenzvai neix miz boux lwgmbwk gig gyaеundeih he, bouxcoz gyaеz hwnj de lo, hoeng boux lwgmbwk yenzvai neix aenvih de yakyawj, mbwq de dangqmaz.

Daengz yaek lizhai seiz, bouxcoz haenq

damj bae ra boux lwgmbwk yenzvai neix, bajbingq aen gihvei doeklaeng caeuq de gangjvah. Boux lwgmbwk yenzvai naj lumj bouxsien nei, bouxcoz caeuq de raennaj wnggai gig angq. Hoeng, bouxcoz doeknaiq dangqmaz, aenvih boux lwgmbwk yenzvai neix itcig mbouj cingqda yawj de. Doeklaeng, bouxcoz najmong dwk cam: “Mwngz saenq vunhyinh dwg mehmbwn dingh lwi?”

Boux lwgmbwk yenzvai neix lwgda yawj namh dap coenz vah he: “Gou saenq,” youh fanj cam de, “Mwngz saenq mbouj saenq?”

Bouxcoz dap naeuz: “Gou dingqnaeuz, boux sai ndeu okseng gaxgonq, mehmbwn couh rox lwnh hawj de doeklaeng de rox aeu byawz guh yah. Gou okseng seiz, couh rox byawz dwg yah gou lo. Mehmbwn lij naeuz yah gou mboujdan maj ndaej yakyawj caemhcaiq lij laenggungq. Seizhaenx, gou couh ngaеq mehmbwn: ‘Mehmbwn a, boux dahsau he maj ndaej yakyawj caemhcaiq laenggungq dwg baenzneix camj, gouz mwngz aeu laenggungq de hawj gou, caiq dawz ndei yawj gou ce hawj de.’”

Bouxcoz gangj sat, boux lwgmbwk yenzvai neix yawj da de gig caensim, ndawsim couh deng vah de gauxluen lo, boux lwgmbwk yenzvai neix couh iet fwngz hawj de, doeklaeng couh bienqbaenz yah de lo. Gvanyah neix itcig doxyaez daengz laux.